



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 7

AFSPA ajanga NE nung telungpur khuret mekoktet: Conrad Sangma

Pakistan nungi kiralonggraba tera nungi atsüdoktsü: Rajnath Singh

VOL. XIX NO. 66 (ADOK 66)

DIMAPUR

TENTONÜ (MONDAY)

LUCHII

(DECEMBER) 13, 2021

₹ 5.00

Oting Village Council-i jangjashitsür

Dimapur, December 12, 2021 (TYO): Oting Village Council-i social media nung noksa ka den tezüluba prokshiba atema osang jangjashitsüogo.

December 5, 2021 nü Oting nung kanga dang mazüingi alidang ozü Minister Paiwang Konyak aser Mon Deputy Commissioner nati envelope ka nung Rs. 18,30,000 enoker bener arua agütsü.

Iba anogo onok tasürtem post mortem agiba, Konyak Union den senden amen, asüpila sentong renemba aser ainertem aruba anepalua kanga dang mazüingi liasü, ta Oting Village Council-i sangdong ka nung ashi.

"Onok nem sen bener arua

agütsübaji Minister Paiwang Konyak-i temeim mapa sayuba onoki bilem. Ajisüaka, ibaji state sorkari tasür aser yirua alir kibongtem nem jelia teyari agütsüba ta osang tejanga metet" ta parnokisa ashi.

"Anungji, Indian Armed Force nung 21st Para Commandos nung aibelenertem ozüing tapet agi memerenshi tashi aser ano Northeast ajanga nungi AFSPA magien tashi Oting village council aser takoksa ajuruba kibongtemi senotsü teyari kecha magizütsü" ta Tahwang Angh, Chingwang Dy. Angh, Mongnei G.B, Nyanei G.B aser Longwang Konyak Chairman nungertemi sign asüba sangdong nung metetdaksüogo.

BAN-i SARFAESI Act pelaa agizüker

Dimapur, December 12, 2021 (TYO): Nagaland state sorkari Securitization and Reconstruction of Financial Assets and Enforcement of Security Interest (SARFAESI) Act, 2002 tenzükba atema pelaa metetdaksür ta Business Association of Nagas (BAN)-i ashi.

Covid-19 wara ajanga shishilembartem takoksa ngur tang shia arutsü merangba mapang ka nung Nagaland nung iba Act ya mapang tajung ka nung tenzükogo, ta BAN President L

Mongkum Jamir aser Dr Yan Murry nati sangdong ka nung ashi.

SARFAESI Act tenzükba ajanga Naga entrepreneurs aser shishilembartemi mapa tuluba inyaka otetsü aser mapa tasentem adokdaksütsü. Iba ajanga state rongsenketzüng tajungba akümtsü, ta tenatisa ashi.

Nagalang nung SARFAESI Act jungjunga inyaksü atema BAN-i bank aser senotsü rejutem den amalitepa inyaksü, ta mendenpurtemisa metetdaksü.

Tanü SCs, STs atema national helpline ka tenzüktsü

Guwahati, December 12, 2021 (Agencies): Union Ministry of Social Justice and Empowerment-i December 13 nü National Helpline Against Atrocities (NHAA) lapoktsü.

Iba helpline ya Scheduled Castes and the Scheduled Tribes (Prevention of Atrocities) {PoA} Act, 1989 shitik inyaksü alizüing nung lapoker. Scheduled Castes (SCs) aser Scheduled Tribes (STs) züngsemtem dak tashiyim inyakba noktangtsü atema iba Act ya yanglu.

NHAA ya linük ajungalen nungi toll-free number 14566 nung jembittetsü ta Ministry of Social

Justice & Empowerment-i metetdaksü.

Iba helpline ya linük nung Telecom Operator mashi ka indang mobile mesüra land line number ajanga voice call /VOIP nung jembitsü akok.

Iba helpline nung Hindi, English aser State/UT tem indang regional language nung angutsü. Maneni Mobile application ka angutsü.

Iba system ajanga ken o agütsüba ajakji FIR ka ama benoktsü, teyari agütsütsü, ken o ajak bushisüngdangtsü aser okadak chargesheet agütsütsü, ta Ministry of Social Justice & Empowerment-isa metetdaksü.

Karbi Anglong nung Rs 4 crore alang hon apu



Bokajan, December 12, 2021 (Agencies): Assam kübok Karbi Anglong district nung police-i hon seret 8 tema apu.

NH 36 nung Manipur nungi Guwahati-i aoba Hyundai Venue gari (AS01EV 2350) nung hon bona aliba apu.

Dillai police-i check gate nung akhi ama gariji soter kulikaketem meshia repring, idangji Maising Tokbi ta ser home guard kati gariji mita repringdang driver dak taittsü ajitet.

Iba jagi home guard-i gariji jungjunga repringdang tarpaulin tanak ka nembanga aliba taseptsü 4

ngutet. Taseptsütem nunggi gold bars 49 liasü aser iba indang jengjangi Rs 4 crore shi ta asadangtetogo.

Mezüngbo hon shibelenertem jagi Home Guard Maising Tokbi nem süpokrem agütsütsü mesüzük saka pai ibaji magizük aser pa den temaba ketdangtsür nem osang sangoktsü.

Iba dak sendakba nung police-i nisung ana- Prakash Basnet (32) aser Subhash Bista (24) na puogo. Tenaprong ya Manipur nung lir.

Tena dang asüngdangya asüdang honji Manipur nungi bener aru aser Guwahati nung agütsütsüba liasü ta nangzükogo.

AFSPA tashi amshia nisung tepseter aser reshikangshir: Minister Kashiho



Deobar nikongdang Konyak Union-i Kohima nung Konyak nung tasürtem nem tetushi agüja sentong ka ayonga agiba angur. (Kohima, December 12)

Kohima, December 12, 2021 (TYO): 1958 nungi Army-i AFSPA nungi tajangzük agia nisung aika tepsetogo aser reshikangshia arur anungji iba tashiyim aketba ozüing ya agientsüla ta Geology & Mining and Soil & Water Conservation Minister, V Kashiho Sangtam-i ashi.

Konyak Union-i Konyak nung tasürtem nem tetushi agüja sentong ka ayongzük agidang Kashiho Sangtam-i Eastern Nagaland Legislators Union (ENLU) tenüing nung o jembu.

"Nagalang aser tanga North East state temi mapang talangka AFSPA agientsü atema takhangba agüja arur" ta pai ashi.

"Armed Forces (Special Powers) Act benokba ajanga asenoki Central Para military forces ket nung tebang agi meshiteta timtema arur" ta paisa shisem.

"AFSPA tenüing nung nisung meyrjang aika taküm samaogo aser kibong meyrjang aika nung tejashi bentsür aruogo. Public aser sorkari iba Act anema ola

adokba ya mangashir" ta Kashiho Sangtam-isa metetdaksü.

"Oting, Mon nung asen Konyak nung adianutem tepsetba ajanga iba Act rasaa mashi nunga angatetogo. Iba Act dak tashiyim lir aser nisung bendanga amshir, anungji agientsüla" ta paisa ashi.

Nagalang sorkari special cabinet senden ka amen aser idangji AFSPA agientsü atema cabinet memo ka agizükogo. Maneni IGP ka lenisüba kübok SIT tentetogo aser parnoki ita ka tsüngda osang agütsütsü, ta Minister Kashiho-isa ashi.

"Nagalang aser India sorkartemi aibelenertem ozüing tapet agi merenshitsü atema State Assembly nung ENLU MLA 20-i inyaksü ta onoki Oting aser Konyak nung dang nangzük" ta paisa ashi.

"Sorkari iba onük süoki ia bilemetsüla aser tekaratiba nung telemtetba ka agitsüla. Konyak nung nem temeten agütsütsüla aser Naga nung AFSPA talenba nungi salatsüla" ta Eastern Nagaland Women Union Kohima president Lemei B. Phom-isa ashi.

"Naga nung longjemtsüla. Tan yabo asenoki alima dang Naga nung ka dang lir aser tarutsü pututem tashiyim mapa nungi kümzüka ayutsü ta sayutsüla" ta laisa ayongzük.

"Iba lendong ajanga Naga nung arakzüdaksüogo aser külemi longjemdaksüogo" ta Eastern Nagaland Peoples' Union Kohima president N Toshi Chang-ia ashi.

"Naga nung nüktzü ayimer aser item nüktzü ya melamela makongtsü ta India sorkari metettsüla" ta pai metetdaksü.

"Shimo milen amer sentong agiba ya Konyak nung takhangba tembanger masü saka tenzükba lir. Onoki temeten mangu tashi inyaksü" ta Konyak Union Kohima president H Angnyei Konyak-ia ashi.

"Tai maket nisung 14 tepsetertem nem Naga nungeri tatok magütsütsü aser kodanga mamatsü. Centre sorkari Nagaland nungi AFSPA agientsü atema Tsüngremi tangatetba agüjang ta asenoki sarasademdi" ta Angnyei Konyak-isa ayongzük.

COVID-19 Nagaland: Nisung 4 dak putet & 3 taneptsü angu

Kohima, December 12, 2021 (TYO): Nagaland nung Deobarnü nisung 4 dak COVID-19 putet aser 9 taneptsü angu.

"Tanü Kohima nung nisung 3 aser Mokokchung nung nisung ka dak COVID-19 putet" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tanü nisung 9 taneptsü angu. Parnokji Dimapur nung nisung 4, Kiphire nung 3 aser Kohima o

Mokokchung nung kaka lir. Nisung 32,155 rongnungi 30,287 taneptsü nguogo aser ibaji taneptsü angur 94.19% lir" ta paisa ashi.

Tang nisung 102 anepaludar saka parnok 82 dakbo shirangba yimya kecha mali ta paisa shisem.

"Honibar tashi nung nisung 760,430 nem COVID-19 vaccine indang dose 13,22,539 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,983, healthcare workers 16,004, arishi küm 45 ser temapur 211,995 aser arishi küm 18 nungi 44 tsüngda alir 471,448 lir" ta paisa ashi.

Vaccine agirtem rongnungi nisung 562,109-i dose anaprong agiogo. Parnokji frontline workers 48,569, healthcare workers 13,531, arishi küm 45 ser temapur 175,868 aser arishi küm 18 nungi 44 tsüngda alir 324,141 lir" ta Dr Thurr-isa ashi.

Manipur Assembly nung AFSPA tongti süa jembitsü

Imphal, December 12, 2021 (Agencies): Sangküm tetenzüklen Manipur Assembly elections nung Armed Forces (Special Power) Act, 1958 agientsüba ya kanga tongti süa jembitsü akok.

December 4 nü Nagaland nung sepaitemi civilian 14 tepsetba sülen Northeast nungi iba Act agientsü takhangba ulushio.

BJP den yariteper telok ana Naga People's Front (NPF) aser National People's Party (NPP)-i Manipur nungi AFSPA agientsü takhangba agütsüba sülen Manipur nung opposition tongti Congress-ia Honibarnü iba kasa

takhangba agütsüogo.

Tawa tu NPP aser NPF teloktemi tashiyim aketba ozüing agientsü takhangba agütsüogo. Iba Act ajanga Northeast nung telungpur khuret mazüoktet ta parnoki ashir.

"Tang Parliament nung Winter Session agidang Manipur Chief Minister N. Biren Singh-i Prime Minister Narendra Modi dang AFSPA agientsü atema rongshitsüla" ta Manipur Pradesh Congress Committee, working president Keisham Meghachandra-i ashi.

"Manipur cabinet-isa state ajungalen nungi tangsa AFSPA

agentsü atema bangzüngteptsüla" ta pai ashi.

"Taoba mapang Congress sorkari Manipur nung Assembly constituency 7 nungi AFSPA agienogo" ta Meghachandra-isa shisem.

"2022 election nung Congress-i sorkar kümra, mezüngbuba cabinet senden nung iba atema telemtetba ka agitsü aser Manipur state ajanga nungi AFSPA agentsü" ta paisa metetdaksü.

Menden 60 agi akümba Manipur Assembly indang election ji sangküm February-March nung agitsü akok.

State nung December 11 nü National Lok Adalat agia liasü



Dimapur, Luchii/Dec. 12 (TYO): Linük ajunga den külemi December 11, 2021 nü Nagaland nung tesem ajungalen District Legal Services Authorities balalai National Lok Adalat (Peoples Court) ayongzüka agia liasü.

District Headquarters shia nung Lok Adalat Sitting benches 11 tenteta liasü.

Angateteptsü asoshi ken o 736 nungi State Lok Adalat ajanga ken o 212 tembangtsü aser item ya Bank Recovery, Criminal Compoundable cases & Motor Accident Cases Tribunal (MACT) telemsa nung timba pending stage nung aser pre-litigation stage nung alibatem timba liasü.

Ken o kar nung senotsü indang liasü, kong sen ajak senteper 3,08,64,322 indang jembia ken o tembanga liasü.

Item ken o ya District tem nung subordinate court tem nungi Judge lenisüba kübok agia liasü.

Iba Settlement Amount ya telok balala tsüngta tangatetem nung menoktsü lemtetba lir.

Yangji senchi sen, Bank dang sen apuba menoktsü alibatem, money suits aser compensation amala dena lir.

State kübok tesem balala nung Bank ketdangsürtemi tangatetba tajung nung iba Lok Adalat nung shilem agiba yong bank dang menoktsü aliba sentsü-lutem indang ken o tajungtiba nung jembia liasü, ta Nagaland State Legal Services Authority ajanga ashi.

Bank ketdangsürtemi temolung agüja amalitep akaba yong ken o aika tekeraba nung aser senotsü tali meindoki tembang aser sentsüh aika menoka ken o nung dena alirtem kisüing masü saka bank aser financial institution tema ajangzüko.

Alternate Dispute Resolution methods ajanga National Lok Adalat (Peoples' Court) ayongzüka agitsü Nagaland State Legal Services Authority dak tashi lir.

Linük den külemi iba ama Lok Adalat ya mapang shia agia arur aser iba sentong ya ajanga angati nung nüburttem/litigants/party tem ajangzüka arutagi.

ZUNHEBOTO : Zunheboto District Legal Services Authority ajanga December 11, 2021 nü District Court Complex nung Lok Adalat agia

sen 15,89,616 jenjang ken o tembanga jembia liasü.

KIPHIRE : Kiphire District Legal Services Authority ajanga National Lok Adalat ya December 10, 2021 nü agia liasü. Iba mapang Judicial Magistrate (First Class) cum Secretary Kiphire DLSA Cheliam Khiarniungan, NJS ajanga Lok Adalat tajangzüik indang nüburttem den lemsatetep.

Kiphire nung Lok Adalat ya Presiding officer ka aser conciliator ka den SBI Kiphire Branch aser NSCB LTD, Kiphire nungi teshimtet nübu tem dener agia liasü. Iba mapang ken o 37 jembia sen 4,73,583 jenjang ken o asem tembanga liasü.

WOKHA : Wokha nung National Lok Adalat ya December 11, 2021 nü agia liasü. Iba sentong nung Develu Vero, District & Sessions Judge, Wokha cum Presiding Officer ajanga Lok Adalat teyari indang jembia liasü.

Iba sentong nung Khrievono Seletsu JMFC cum Secretary WDLA, Presiding Officer aser danga panel lawyer tem dena ken o 10 nungi 7 tatem kuma jembia aser pending nung aliba ken o ka jembia liasü.

Iba mapang sen 12,62,797 jenjang ken o jembia renema liasü.

PEREN : Peren District Legal Services Authority ajanga Jalukie Town Rest House nung National Lok Adalat sentong agia liasü, kong Jalukie SBI, Peren SBI aser Co-Operative Bank den sendaka aliba ken o jembia liasü. Iba mapang sen 26,34,188 jenjang ken o 33 benoka jembia liasü.

TUENSANG : Tuensang District Legal Services Authority ajanga National Lok Adalat sentong agia liasü, kong Principal District and Sessions Judge cum Chairman, Tuensang DLSA, N.Longshithung Ezung aser JMFC cum Secretary, Kumdilong Kessen na Presiding Officer liasü.

Iba mapang pre-litigation cases 23 benoka jembia aser sen 15,88,375 jenjang cases 15 tembanga liasü. Kasa mapang pending cases ana benoka jembia tembanga liasü.

MON : Mon District Legal Services Authority puri District

Court Front office nung National Lok Adalat sentong agia liasü. Iba mapang Bank dang sen apua aliba mapang shidak nung memonoktetba ken o 59 tashi benoka jembir ken o 12 tembanga liasü. Iba mapang sen 2,76,367 jenjang ken o tembanga jembia.

KOHIMA : Kohima District Legal Services Authority puri National Lok Adalat ayongzüka agia liasü, kong Principal District and Sessions Judge cum Chairperson, Kohima DLSA, Y Longkumer presiding officer liasü.

Iba mapang Lok Adalat matsüngdang ken o 379 benok, kong Bank recovery cases 228, Telephone bill (pre-litigation) 9 aser pending cases ka nungi ken o 31 tembanga jembia liasü. Sentsüh 67,96,149.71 aliba nungi sen 35,18,791 indang ken o tatem kuma jembia aser Bank aser Telephone temi National Lok Adalat ajanga sentsüh sen 32,77,358.71 atok.

DIMAPUR: Dimapur District Legal Services Authority puri December 11, 2021 nü National Lok Adalat sentong ayongzüka agia liasü. Iba sentong nung Chief Judicial Magistrate & Secretary Dimpaur DLSA, Seyielenuo Mezhi-i o tatsüka jembia liasü.

Iba sentong nung ken o 103 benoka jembir ken o 76 tembanga liasü. Iba mapang sen 1,69,20,818 indang ken o tatem kuma jembia liasü.

MOKOKCHUNG : Mokokchung District Legal Services Authority puri December 11, 2021 nü National Lok Adalat sentong ayongzüka Principal District and Sessions Judge Court room agia liasü.

Iba mapang ken o 15 benoka jembia aser sen 77,000 jenjang ken o ana tembanga liasü.

LONGLENG: Longleng District Legal Services Authority puri District Court Longleng aser Tamlu Town EAC Hq nung National Lok Adalat sentong ayongzüka agia liasü. Iba mapang sen 1,48,600 jenjang ken o 26 benoka jembia aser item ken o ajak tembanga liasü.

September 11 nü 3rd Quarterly National Lok Adalat aliba mapang ken o 1113 aluba nungi sen 4,86,00,875 jenjang ken o 576 tembanga jembia liasü.

Union Minister Rajkumar Ranjan Singh-i CIT Kokrajhar semdang

Kokrajhar, Luchii/Dec. 12 (Agencies): Union Minister of State for External Affairs and Education, Dr. Rajkumar Ranjan Singh-i Deobarnü CIT Kokrajhar semdanga liasü.

Iba mapang Union minister Dr. Rajkumar Ranjan Singh-i CIT Kokrajhar indang Central Library nung Bodoland Territorial Region (BTR) indang Chief Executive Member (CEM), Pramod Boro lia CIT Kokrajhar management den senden ka mena liasü.

Senden metenzükdang Union minister-i CIT Kokrajhar nung kaketshirtem ajurua liasü, shirnoki pa dang parnok project tem indang poster sayua liasü.

Iba senden nung IIT Guwahati indang Director aser CIT Kokrajhar indang Director (additional charge), Prof. T.G. Sitharam-i Union Minister pela agizük aser Registrar Chaitali Brahma aser danga Dean tem metetpelaba mapang liasü.

Registrar aser Prof. Biswarup Saikia, Dean, Planning and Development, CIT Kokrajhar ajanga iba reju indang aser courses agütsüba, department tem aser lab facility indang rasaa shia liasü.

Registrar-i jembiba mapang lab facility aser hostel facility tali nüngdakba indang shia liasü.

Iba sülen Dean ajanga iba reju nung timtem balala ajuruba aser teimla indang lemsatetepa liasü.

Iba senden nung mapang talangka nungi 33 KV dedicated power line nüngdaka aliba indang Dean of Student Affairs, Dr.

Bihung Brahma ajanga benoka liasü.

Poster presentations nung kaketshirtemi meranga inyakba atema senden nung Union minister-i tenüngsang agüja liasü.

"Poster indang quality ajanga research tsütsü iba reju indang jenjang sayur," ta Union minister Rajkumar Ranjan Singh-i ashi.

Pai Food Technology department dang pelaba indang lemsatetep aser yangji anguba chiyongtsütem tali temaba jenjangi ajungkettsü asoshi research tali agitsü atema temolung agütsütsü ajungshia liasü.

Pai CSIR-Central Food Technological Research Institute, Mysore den MoU ka zülutep nung ajungtsü ta shia liasü.

Union minister-isa basic sciences temaba jenjangi ajungkettsüla aser iba atema IIT Guwahati den lungjemer inyak nung ajungtsü, ta ashi.

Rajkumar Ranjan Singh-i Robotics projects pelashishia agizük aser artificial intelligence nung project tali inyakttsü ashi.

Paisa iba reju dang central sorkar indang New Education Policy sülen anidaktsü shia liasü.

Union minister-i multidisciplinary studies agitsü ajungshi aser Humanities and Social Sciences ya tongtipang subject tem lir, ta shia liasü.

Kaket reju tem nung ki-o-jen timi amshitsü aser bendanger den lungjemer mera agitsü ajungshia liasü.

Iba reju yagi water resources aser water supply indang nunga inyakttsü, ta paisa ashi.

BSF Kohima ajanga nok-o-nü sayuba sentong agi



Kohima, Luchii/Dec. 12 (TYO): Bangladesh Liberation

indang küm 50 ajungba benjongmung nung shilem ka ama 37 Battalion BSF pur Chedema, Kohima nung amenoka alirtemi 'Weapon Exhibition' sentong ka December 12, 2021 nü parnok alidak ayongzüka aser Bangladesh liberation indang documentary sayua liasü.

Iba sentong nung civilian ketdangsürtem, yimdaklir, school tesayur aser kaketshirtem arua dena liasü. Iba mapang BSF temi amshiba hadir aser oset balala sayua liasü.

Tanurtem dang nok-o-nü aser hadir tabu balala sayuba den külemi item amshiyim indang sayua liasü.

Taküm ya Bangladesh nüjiso ngur küm 50 ajungba benjongmung amunger.

March 26, 1971 nü Bangladesh ya nüjiso anguba linük ka ta Sheikh Mujibur Rahman-i sangdong aser ibaji ajanga Bangladesh Liberation War ya tenzüka India teyari nung Bangladesh liberation forces aser Pakistan tsüngta rara liasü.

Bangladesh liberation war mapang Border Security Force (BSF) temi "Mukti Vahini" indang training aser tsükchir den raraba atema training agütsüba nung yaria liasü.

Bangladesh liberation war küm 50 ajungba nüngtem nung Border Security Force aser Border Guard Bangladesh ajanga India aser Bangladesh nung sentong balala tenzüka lir.

Welcome to My Handloom My Pride

STATE HANDLOOM EXPO

w.e.f. 7th TO 20th DECEMBER 2021
At URBAN HAAT, DIMAPUR, NAGALAND.
TIME : 10 AM to 5PM

ORGANISED BY:
NAGALAND HANDLOOM & HANDICRAFTS
DEVELOPMENT CORPORATION LTD.
DIMAPUR, NAGALAND.

SPONSORED BY:
Office of The
DEVELOPMENT COMMISSIONER (HANDLOOMS).
MINISTRY OF TEXTILES., GOVT. OF INDIA, NEW DELHI.

15 YEARS OF CELEBRATING THE MAHATMA

AFSPA ajanga NE nung telungpur khuret mekottet: Conrad Sangma

Guwahati, December 12, 2021 (Agencies): Meghalaya Chief Minister Conrad K Sangma-i Armed Forces (Special Powers) Act (AFSPA) magientsü tashi raratsü tenangzükba agiogo.

AFSPA ajanga Northeast nung telungpur maparen mekottet ta Conrad-i yashi Imphal nung ashi.

National People's Youth Front (NPYF)-i Manipur kübok Patsoi nung Hokolbarnü Youth Conclave ka ayongzuka agidang Conrad-i iba onük jembia liasü.

"Tashiyim amshiba ajanga alizüing matongtsü ta asenoki

angatetsüla. Asenoki security maparen atemaa bilemtsüla saka AFSPA ajanga khuret mekottetsü" ta pai ashi.

"Lokti aser rongsenketzung inyakyim ajanga dang khuret koktetsü. Armed Forces tashi amshiba ajanga asenoki ano asen lanurtem tia raksatsür. Anungji iba mungdang nung asenoki item politics aser ozüngtem ajanga teraksa bentsür aruba angatetsüla" ta Conrad-isa ashi.

AFSPA ajanga Indian Army aser Central forces nem tashi balaka agütsür. Northeast nung AFSPA ya Nagaland, Assam, Manipur (Imphal nung

assembly constituency 7 maden) aser Arunachal Pradesh kübok tesem kar nung benoka lir.

Meghalaya nungbo 2018 küm AFSPA agienga liasü.

Manipur nung agiba Youth Conclave nung Manipur deputy chief minister Yumnam Joykumar, taoba minister L Jayantakumar, NPP Manipur unit president N Kayisii aser NPP Arunachal chapter president Mutchu Mithi nung aden.

Züngsem 60 agi akümbe Manipur assembly nung NPP MLA 4 lir aser BJP-i aniba state sorkar nung parnoki yariteper.

Sonowal & Mary Kom na Dibrugarh University sentong nung aden



Dibrugarh, December 12, 2021 (Agencies): Union Minister of Ports, Shipping and Waterways and Ayush Sarbananda Sonowal aser boxer MC Mary Kom nati Deobarnü Dibrugarh University indang 52 buba Varsity Week lapokba sentong nung aden.

University campus kanga tobur junga ayuba aser Dibrugarh University kaketshirtemi wadang balala nung takok tajung anguba atema Union Minister Sonowal-i tenüngsang agütsü.

"India nung alemli nungi sobaliba mozü amshiba arur aser North East nung süngdong-lidongtem amshia iba sobaliba tajungba bener aotsü lenmang

lir" ta paisa metetdaksü.

"Tarutsü tajung yangertsü atema Economy & Ecology, Humanity & Technology külemi inyaksangshia aotsüla" ta Sonowal-isa ashi.

Union Minister-isa sports icon MC Mary Kom nem tenüngsang agütsü.

"MC Mary Kom ya tanur asem tetsü ka lir saka lai World Championships 6 tashi takok nguogo. La ya asenok ajak ajungmesor ka lir" ta Sonowal-isa metetdaksü.

Linük ka indang tashiji lanur tashi lir aser Prime Minister Narendra Modi-ia lanurtem tashi itdaksütsü atema mapa inyaker, ta paisa ashi.

"Taruba anogotem Ministry

of Ayush ajanga Dibrugarh University campus nung Herbal Garden & Nursery ka aser Research Centre ka lapoktsü atema senotsü teyari agütsütsü" ta Union Minister-isa ashi.

"Taküm nung takok angutsü atema meranga inyakba aser bendanga agütsübaji kanga tongtipang lir. Nisung shia khenyongi balaka lir kechiyong anogoshia balala lir. Meranga inyakba aser bendanga agütsüba den alizüing tulu ayuba ajanga nisung kati pei dak aketba sempet sayuteteter" ta MC Mary Kom-ia ashi.

Iba sentong nung Dibrugarh University Vice-Chancellor, Lilakanta Nath aser tangar aika aden.

NTPC Bongaigaon-i Northeast Festival ayongzük

Kokrajhar, December 12, 2021 (Agencies): India nüjiso ngur küm 75 ajungba (Azadi Ka Amrit Mahotsav) nüngtem nung NTPC Bongaigaon-i December 11 nungi 12, 2021 tashi Northeast Festival sentong ayongzük.

Northeast nung kin balala indang sobaliba sayutsü asoshi iba sentong ayongzuka liasü.

Anogo ana tashi ayongba sentong ya Subrata Mandal, GM (O&M), T. Ravinder GM(O&M), Umesh Singh, GM (FM & Maintenance) aser DP Patra, GM (Operations) matsüngdang Chief Executive Member (CEM), Bodoland Territorial Region BTR), Pramod Boro-i lapokja liasü.

Iba sentong nung Amitava Saha, GM (Safety), AK Chawla, AGM(HR), Shashi Shekhar, AGM(HR) aser Bongaigaon nung alir senior ketdangsürtem denogo.

Northeast indang sobaliba sayutsü asoshi iba Festival ayongzükba atema, Pramod Boro-i NTPC dang pelaba metetdaksü.

India tejakleni aoba anogomung ajangzüktsü asoshi taküm bendanga agütsür inyakba atema Boro-i nüjiso

atema rarartem bilemtet.

Iba sentong nung, Boro-i handicraft stall aser food stall tem semdang aser Northeast kin balala indang sobaliba mesamadaksü benshiba atema pai MSME vendor tem dang pelaba metetdaksü.

Iba benjungmung nung, Bodoland Territorial Region (BTR) indang district pezü Chirang, Baabsksa, Udalguri aser Kokrajhar nungi shilem agirtem Bodo Kavi Sammelan ayongzuka liasü.

Pramod Boro-i, "Akhüm ka kübok sangro zülur (poet) 11 tashi adenshidaksütsü asoshi NTPC-i meranga inyakago aser sangro zülurtemi pei tebilembatem kaket balala ajanga lemsatepba ajanga Northeast India indang sobaliba sayur," ta ashi.

Iba sentong nung sangro zülur ajak (11) dang pelaba temaitsü sayua NTPC nungi parnok nem citation agütsü.

Northeast Festival mezüing anogo nung, Assam indang sobaliba balala tsüngsangba ajanga sayu aser ethinc fashion show den folk orchestra agia liasü, koba Kokrajhar aser Bodoland Territorial Region ajanga pelashishia agizükogo.

Karbi Anglong nung shidi ana sür lia angu

Kaziranga, December 12, 2021 (Agencies): Deobar anepdang Karizanga National Park tesem nung shidi ana sür lia ngutet.

Shidi tasümgang ana ya Assam indang Kaziranga National Park sendaka Karbi Anglong tesemlen Dolamara anasa ngutet.

Shidi ana asüba ya ano kuli tejangja menguteti lir. Tawa tanü Assam nung shidi kar asüba

osangtem ajanga angazükogo.

December 1, 2021 nü Kamrup Metro district, Guwahati anasa Khetri nung Rajdhani Express train kati shidi ka dak tsükokja liasü.

Ano, November 16, 2021 nü Hojai district kübok arem shidi ka electric current agi pua asü.

Aji masüdag, October 28, 2021 nü Udalguri district nung küm 30 tain shidi tebong ka meim mozü chir sür liasü.

Dhubri police-i temesepba mozü shibelener ana apu

Dhubri, December 12, 2021 (Agencies): Dhubri police bike rider team kati miimbanga tesem ka mita aoba mapang e-rickshaw nung brown sugar jenti ngutet aser nisung ana apu.

Osang tejangja ka nung ajemdaker Dhubri aser BN College Town Outpost indang police bike rider team, In-charge Chanakya Das-i anir Dhubri tezülen Nathpara tesem mita ao aser iba mapang team-i pungdang nung inoker aliba brown sugar ngutet aser iba

maparen dak sendakba nung e-rickshaw anisang densema temesepba mozü shibelener ana ya pua liasü.

Pua alirtem ya Kusumuddin, Aironjongla nung alir Abdul Halim Sheikh aser e-rickshaw driver ya Dhubri district kübok Newghat tesem nungi Mahibul Islam ta jangjaogo. Pua alir ana yagi iba tesem ana meta temesepba mozü (brown sugar) ya ayoktsü asalentong yanglua liasü, ta police sangdong ajanga metetdaksü.

Digboi Refinery-i 'foundation day' mungogo

Tinsukia, December 12, 2021 (Agencies): Digboi Refinery-i Hokolbarnü Makum anasa Gangabari tesem nung aliba Keshav Baheti Surjadaya Children Home tanurtem den foundation day mungogo.

Iba anogomung nüngtem nung, refinery ketdangsürtemi tanurtem nem sempet den tanga nungdakba osettsüset tenla agütsü.

Iba sentong nung, executive director & resident head,

Kailash Pati aser tanga ketdangsürtem talisa KBS Children Home, secretary Akhil Chandra Baruah densema Raymond Diengdoh, Pankaj Handique, Hirumoni Rajkonwar, PK Dewri aser Abhijit Saikia nung denogo. Iba Home nung nungdakba ajiteta teyari agütsüba atema, superintendent of children home, Priyanka Sarma-i IOC (AOD) ketdangsürtem dang pelaba metetdaksü.



TIR YIMYIM YIMOBILEM (EDITORIAL)

DIMAPUR TENTONÜ, LUCIII (DECEMBER) 13, 2021

Peisasa mapa tenzüksüla

Asenoki asenok inyaksüba mapa ya tangar kati arua tenzüksütsü mesüra agütsütsü amai bilemer, iba jagi asenok mapa manguba atema aiben asenoki government aitsür. Atangji, government ket nung, talisa, lanurtem pei sempet aser tazüng temeteba dak alang mapa agütsütetsüsa tokolok, shisatsü aser sentong alitsüla. Ajisüaka, asenok pei taküm lia aotsü atema tangari mapa agütsü ataba ya, asenok tangar kilir mesüra tangar lar asütsü kibur bushir amai lir. Ibaji kodang asenoki angatetdir, asenoki asenok nem asen inyaksüba mapa tangari agütsü matatsü. Tanü tashi asenok aika mapa mangu timtemba ya asenoki asensasa mapa bushia tenzükter masü saka tangari agütsü atar, iba jagi tazüngertema zünger mapa aru ataa kecha meinyak kidang kazür aser mazüngertema mapa maka kazü longzua senzür. Tangbo asenok tia junga asen li bank nung khen atema lilema toktsür sen apua mapa inyaktetsüsa Nagaland nunga Securitisation and Reconstruction of Financial Assets and Enforcement of Security Interest Act, 2002 (SARFAESI) ozüng amshitsü tenzükogo. Anungji, peisasa pei jangraba aser akokba mapatembo tenzuka otetsüsa bank nungi sen aputetsü. Aji oda, ibai Nagaland nung lanurtemi peisasa mapa inyak tenzuka aoba putu tensa ka tenzükter asütsü. Joko, Nagaland nungbo government mapa tasen madokba dang masü saka tang inyakertem nema ita sen magütsütetter, anungji tang amai government mapa nung nisung anati inyaksüba mapa ka nisung trok nem taa agütsür inyaksü nungloksüra government moutetsü. Tang Nagaland nung mapa meinyak ita sen agir teimba asüba ya shinga atema jangratemtsüka masü. Mapa meinyak ser sen angubaji temoatsü masü saka taküm lenmang mashileni aniba inyakyim ka lir. Iba jagi, asenok rongnunga, nisung aika ashioktsüogo aser meshimetsür aika kumogo. Tanü asen lima nung mapa mangu kazür aser meshimetsürtem ya, shitakbabo, mapa mangutsüla aser meshimetsür akümtsüla nisung masü, saka parnok jagiang tangar asoshi mapa inyaker meinyakma adokdaksütetba nisungtem aser parnok jagiang tangar nem teyari agütsütetsüsa parnoksasa mapa tulu tenzuka inyaktetsü purtem lir. Ajisüaka, asenoki asenoksasa asenok dak aliba tashi aser sempet mebushitetba agi kibur akümtsü melen kilir akümtsü dang bilema kilir-a mekümtet takidak maka taküm kuma odaktsür. Iba tangatetba nungi asenok meyipdi aser asensasa asen dak aketba tashi aser sempet amshia nübortem nungdakba yanglutsü aser ayoktsü tenzükdi. Atangji, asenoki asen lima nung tangar ama industry tulu lapoka meinyaktetsüsa akok saka asenoki chiyongtsü aser osettsüset tapu balala yangluba factory tilalabo lapoka inyaktetsü. Aseni mapa kar tenzuka inyaksü bilemyonga teka nung sen malitsüa akok, saka kecha masü, senji tama masü saka temulungtetba aser temulung lemtetba na tama nungdaker. Aseni dang mulungtetra aser aseni inyaksüba mapaji nübortem nungdakba ka süra aser asen dak ajaki temulung lemtetra senji yangji lir. Asenoki, tamasayongi, mapa tuluka tenzüksü meiblemli, saka bank nungi sen mechimenuka apua alu ayim tenzüksüsa akok, ak an, nashi nabong metsütsü mesüra süng long mapa tenzuka inyaksüsa akok. Iba amaji inyaka-inyaka alu tuluba akümtsü, factory tuluba amenoktsü aser chiyongtsü aser oset yanglua ayoker akümtsü. Ano asenisa meyangluyonga asenoki tangari yanglubatembo yoktetsü, anungji mapa tenzuka dokan tilaka lapoktsüa akok. Aji oda, reprangdangyonga oang aser bilemdang, nai kechi dokan ka mentetsü? Atangji, dokan amentsüba mapa yaa temela masü. Anogo shia anepdang nungi aonung tashi kasa dokan nungji kecha moi amentsüla. Dokan amenertem asoshibo benjong mapangang talangba amentsü. Iba jagi asenok aikati alaker aser mementetter. Ajisüaka, alima nung anogo shia asen onüleri aotsü aser mounüadang maotsü, inyaknü dang inyaksü aser meinyaknü dang meinyaktsü ta asüba mapabo mali. Ibajibo mapa kibur aser teyariteper ta mali, ajak atema talenba ka lir, iba jagiang mapa akoker aser nübortem nemang nungdak shitak agütsütetter. Joko, asenok aluyimba dang masü asenoki züsentetba nungi chiyongtsü yanglur aser ayoker kümdi. Aji oda, asenoki kechi yanglur aser kechi ayoker, itemji talirtemi temulung süsüa alitsüsa asenoki inyakba mapaji tajung aser asenoki meshiba jenjangji shitak asütsüla. Tang tashibo asenok mapa mangu tangar dang alizüka chiyonga amongertem dang lir, anungji asenok nem government-i ita sen agütsüba ajak ya tangar keti aoer. Iba senji danga asen ket nung ayutsüsa, arung lanurtem, asenokbo asensasa asen jangraba aser nübortem nungdakba mapa tenzuka inyakdi.

OLEMSABANG

ABAM Differently-abled People Sunday, 12th December
Kibuba Kü Teyarir: Tayongzükba Tatsüka

~ Tiatoshi Longkumer

OKILA: Nungsangba aser lmitla tena kibong kümer külen tanur arutsü yongya aser sarasadema ata. Saka küm aika tanur mongoteti aru. Aginür saka tanga lenmang kecha makai alidang, lmitla temang nung ajungbena tanur tanglokba yimya kar sayu. Anungji süngmangseta apu-ani doctor dangi or test agidang nung atangji positive sign angu.

Tena pelaseta iba osang tajungji bener kidangi shilang aser Tsüngrem nem tenungsang agüjaa sarasadema temang anepalu tenzük. Joko ita pungo terok akümdang, tetsü temang nung meinprong tera tenzük. Aser kodang doctor-i ultra sound agia reprangdang, indangji khuret tasen ka tena tenzük. Tepok nung aliba tanurji temang shilem kar mabensai asotsü ta doctor-i metetdaksü.

Iba taoksatsü osangji bener tena ano kidangi shilang. Tena mezüng tanur, aser shibai metet, tatembangbuba tanur-a asütsü akok. Aginüseta sarasadema langzuba temoatsü saka ano khuret ka ama kumadok. Nungsangba aser lmitlai tarutsü tia ji bilema abortion agitsüa bilemdang, kechiyong ibaji ajak atema anisüngzük asütsü ta bilem. Saka meimchir taküm ka tepok nung tepseta endokbaji tai ta tenati angatet nung ibaji meinyak.

Paonungji tenati tenanzükba ka agi: Koba yimya nung iba tanur sodir-soaka tenati tajungtiba nung yaritsü aser tenzüksü ta bangjemer joko mezüng tanur aso yongyasete ata. Aji oda, doctori ashiba ama, iba jabaso ajak normal süakasa tetsüng aser teka junga metenteti aso. Apua-ni shisatsü nung renema ata nung, tena mezüng jabaso pelaseta agizük aser pa tenung "Tiakaba" jatsü.

Tiakaba temang aser shisatsü nung abensaa ain saka pa tetsüng aser teka metemsü liasü. Pai jajatsü makok aser teka agi arakzua chiyongtsü aser zülutsü mokoki liasü. Anungji tenati nangzükba ama, Tiakabai zülutsü aser koda chiyongtsü ajakji yari aser sayu. Aji oda, Tiaba teka tila jagi spoon amtsü aser pen amtsü lai sayu.

Ano tebu pa tesem ka nungi tesem kati otetsü atema wheel chair ka yanglutsü aser pai jabasoji nonger senzü. Tiakabai pa tetsüng teka mabensaaka running race nung adentsü kanga jangraa TV nung reprangbaji ajiteta, tebu aser tetsü nati pa state marathon race nung dendaktsütsü lemtet. Tebu Tiaba mener wheel chairji anongtsü aser tetsüia parnok asem atema chiyongtsü renemer asemtsü tenzük. Iba marathon race nung tangar ajak normal, saka Tiakaba tang special child liasü saka parnok asem longjemba ajanga Tiakabai alizüng tonga asem. Aser iba anogoji iba jabaso asoshi tepelatiba anogoji liasü. Kechiaser pa tetsüng aser teka meliaka, pai alizüng tonga asem aser sempet angu. Aji oda, pa takümü tangar tenük nungbo mata-mabensar ka ama reprangaka, Tiabai kodanga pa mata-mabensar ka amai meiblem, kechiyong pa kechi nungsa mabensa itemji tetsü aser tebu abensadaksü. Atangji, jabaso Tiakaba atema Tsüngremi yokba teyarir tajungtiba anaji tetsü aser tebu liasü. (Tiakaba's father and mother were the greater God's sent helper). "Kibuba kü teyarir" ta bilemdang, Tiaba nükdangbo Kibubaji tetsü aser tebuji liasü.

Asenok rongnunga teyari nungdaka alibapurtem asoshi anisüngzük agütsütetba kotak tenyarterm aika alitsü akok. Ne taküm ngur Kotak nung aliba tebu Tsüngremji yamai alitsü ta teyari nungdaka alibapurtemi reprangba adianutem asenok rongnung aika alitsü akok. Aser item takümtet ajak asoshi Yisu tenung asanger. Tiakaba tetsü aser tebu mulungteter inyakba ama, ne takümü tashi-maitba aser nungdaka aliba pur ka asoshibosa Kibuba nungi yokba teyarir ka asütsü merangang.

1 Yohan 4: 12 nung ashiba ama, "nisung shingai Tsüngrem kecha südanga mungka. Saka asenoki kati ka den meimtepra, Tsüngrem asenok dak alir aser pa temeim asenok dak tabensa akümer." Alima nung dangbo Tsüngrem tejak meimchiri angutsü makok. Saka Pa tejak mesüka ngudaksütetba ain tashi tulutibaji temeim ya lir. Aser mapa kuma inyaktetba temeim ajanga asenoki kati ka dang Tsüngrem adenba meteter.

Küm aika ogo, Arogo nung lenir Teresa of Avila-i yamai shia liasü, "God has no hands or feet or voice except ours and through these He works." (Tsüngrem teka mesüra tetsüng mesüra ola balaka mali, saka asenok amshia pai mapa inyaker). Nai-a ne taküm nung na-a abensaa asoba taküm ka ta bilemra, item tabensaba takümü mabensaba taküm kar asoshi tabensaba kumdkajaa amshidar ma? Avila-i ashiba ama, Tsüngremji tetsüng-teka aser ola makaba Tsüngrem ka süra, nai ne tetsüng-teka aser olaji Kibuba taküm lidaktsütsü aser meimchir rongnung Pa jungkai adokdaksütsü asoshi Kibuba nem bendanga agütsüdar ma?

Aier chanu Mari-i la takümü kecha masüba taküm ka dang ta bilema liasü. Saka kodang Tsüngrem kotak tenyari la "nuo menden" nungdaker ta mepeshi. Lai ashi, "Ni Kibuba tenzükla, kü dang ne o amaji lidakjangma." Yamaji Mari-i la temang Kibuba sendong asoshi bendanga agütsüba ajanga alimai Tsüngrem chir Yisu, tetesür ka ajanga aru. Ano Anitet 4 nung Tsüngremi Israel chirtem llij lima nungi anitetsü asoshi Mosa ajaba otsü angur. Mosai 4 ben tashi Tsüngremi ajaba nung "ma" ta shia nungtemtsü merang. Kechiaser pai pa iba mapa atema metemsü ta bilem. Indangji Kibubai Mosa dang ashi, "Ne ket nung alibaji kechi?" Pai langzü, "Mecha ka." Aji ali nung tsükdakjang, idangji mechi jagi per ka aküm, ano pai bena aru aser mechisa aküm. Aser Kibubai ashi, "mechi ne teka nung amtsüla aser iba jagi nai sayatenya temaitsütem inyaksüla." (tk. 17).

Aji oda, taküm yimya balaka nung asobapur ka asoshi mesüra nungdakba pur ka yaritsü asoshi, na ajak nung tabensaba akümtsü menungdaker. Saka na kechi aka aji dang amshi-a nungdakbapur yaritsü Kibubai ne dang akhanger.

Mosa kecha makaba nisung ka; o-a dena junga mejimbiteba nisung ka. Saka Kibubai pa ajadang, ne ket nung kechi lir ta dang asüngdang. Aser pa ket nung mechi ka dang liasü. Aser ibaji Kibuba asoshi sayatenya inyaksü teperi liasü.

Yamaji, Tsüngremi na ket nung kechi aka aji dang na aser ni nungi akhanger. Nai aji dang pa dang surrender süra pai tanungbaji inyaksü.

Ne taküm nunga, nungdakbapur mesüra timtimba pur ka atema ne takümü Kibuba nungi yokba teyarir ka ama mongutetsüsa kechi agi na atsüiter? Taküm sempet yimya balala ka nung asoba jala-jabaso ka dang nai Tsüngremi yangluba kesa adianu ka ama magizüktetba shisatsü kar ali asü?

Iba ama anogo ka shimteter meja-meja ABAM-i anir Special person-tem asoshi amongdang, amangbapur shiai iba tangatetba nung mera tasen kabosa agitsü Kibuba dang nangzüksüla. Iba ama special anogo nung, aseni inyaka tenzüksü tajungtibaji - shir kibong nung Taküm sempet yimya balaka nung asoba pur lir, par kibong aser tanür asoshi sarasadem ka danga süjang. Aser ano kokra, iba anogo nung mesüra iba Christmas tsüngkum mapang nung nisung ka danga semdanga ajuruteptsü merangang. Nai itemji inyakdang ne takümü nungdakbapur asoshi Kibuba nungi yokba tenyar ka ama asütsü.

Tsüngremi meimchir ajak yimya balala aser sempet balala nung yanglua lir. Shirnok abensaa lir parnok teyari aser temeim ajanga mabensabapur abensadaksür. Aser shirnok langkha nung mabensabapur lir parnok ajanga ne takümü temoatsüba ka südaksür. Laishiba otsü nung ashir, Mosa taküm nung jembishinü metemsü liasü. Pa temeli tekiki masü asü. saka pa disability-ji tedi Aron-i abensadaksü. Tsüngremi Mosa ajadang pa temeli meyanglushitsü, saka Tsüngremi Mosa mabensaba ka abensadaksütsü atema Aron temili amshi. Atangji, Aronji Mosa asoshi Kibuba-i yokba teyarir tajungtibaji liasü.

Temeim adianutem, asenok-a kati ka yaritepba ajanga tabensaba taküm ka-ka kumdkaktsütsü asoshi Kibubai tanü asen ajar. "Kibuba kü teyarir" ta asübaji kati-ka sendoker azüngmeyaka ayimtenba ola mesüdaksüli. Saka asenok rongnung temeim agi yaritepba ajanga kati ka dang Kibubai yokba tenyar ama ngua Tsüngrem tenungasangba ola südaksütsü asenok ajaki merangteptsü ni Yisu tenung ayongzükter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



December 12, 2021 nü Kohima Liangmai Baptist Church D. Block-i par Arogo nung jeli Khristmas sentong ayongzuka agidang sunday school tanurtemi ken ka atenba noksa nung angur.

Europe nung Khristanem anema inyakba shilem 70 agi timba kümogo

December 12, 2021: Vienna nung aliba watchdog organization kati, Europe nung religious freedom jenjang tamajungba akümba mapang 2019 aser 2020 küm tsüingda Europe nung Khristanem anema inyakba shilem 70 agi timba kümogo, ta metetdaksü.

Observatory on Intolerance Against Christians in Europe (OIDAC) teloki Europe nung religious freedom ajanga Khristanem dak koma kongshir, ibaji asadanger.

Sorkar balalai ozüngtem benokba aser yimtenren inyakyim ajanga Khristanem anema inyakba jenjang parnoki asadanga liasü.

OIDAC-i ashiba agi, parnok organisation kübok Security & Cooperation in Europe indang Democratic Institutions & Human Rights office-i November ita nung annual hate crimes report sangdongogo. 2019 küm Europe nung Khristanem anema inyakba tatalokba 578 liasü saka 2020 küm nungbo Khristanem anema inyakba tatalokba 981 liasü, ta report nungji shia lir.

"Iba tetezü, yaküm nungi tenzüka Khristanem anema inyakba shilem 70 agi timba kümogo," ta OIDAC report ajanga metetdaksü.

"Onoki jembiba dang nungibo züingya agi ola tuluba adoker. Iba kuli ajanga küm 10 tejaklen onoki OIDAC tenteta liasü, kechiyong Europe nung item ama osang bendentsü aser awareness agütsütsü atema tanga organisation maliasü," ta OIDAC-i metetdaksü.

OIDAC-i küm ana dak tema Europe kübok linük pongu - France, Germany, Spain, Sweden aser United Kingdom nung Khristanem anema inyakba aser Islamic-i ambangyima inyakba asadanga liasü.

"Onoki item linük shim, kechiyong Khristanemi item linük nung timtem tuluba ajangshir. Iba report ya lenla balala nungi osang bendena renemogo. Tasüingdangbatem aser mongintem den interview agiba aser takoksa angur Khristanem den interview agiba nung ajemdaker iba report ya renem," ta OIDAC-isa metetdaksü.

Europe nung tesempa nung ajemdaker Khristanem anema inyakbaji France aser Germany na nung timba lir; Spain aser France na dang nungibo Germany tamajungba, ta parnokisa metetdaksü.

"Khristanem anema inyakbaji Germany nung timba liasü. Germany nung

Khristanem anema inyakbaji talisa Protestant aser Catholic Arogo Tenla kitem aser Khristan kiojentem raksatsüba lir. Item rongnung Tenla ki bensatsüba, auyaba, noksa tepsatsüba aser kiojen raksatsüba densema lir. 2019 küm nungi 2020 küm tashi nung Khristanem anema inyakba mesüra Khristan kiojentem raksatsüba tatalokba 255 liasü," ta report nung shia lir.

France aser Spain na nunga Khristanemsa süaka Catholics Khristanem anema timba inyaker. Germany aser U.K na nung Catholic aser Catholic masüba Khristanem naprong anema inyaker.

2019 küm Spain nung religious freedom anema inyakba tatalokba 175 liasü aser iba nungjagi shilem 80 bo (140) Catholic Khristanem anema inyakba liasü.

Europe nung talisa Muslim yimsü toktsür Khristan yimsü agizükertemi timtem tuluba ajurur, sorkar ketdangsertemia parnok ama nisungtem sendoker, ta report nung shia lir.

Taküm July ita nung OIDAC-i, tesüiba küm 10 dak tema arudang France nung Khristanem anema inyakba tatalokba shilem 285 agi timba kümogo, ta metetdakja liasü.

Canada nunger Pastor Darren Canning, Toronto nung apu

December 12, 2021: Canada nunger pastor, Darren Canning-i Africa semdangba sülen meyipa arudang Toronto nung ketdangsertemi pa apu, aser tang pa Toronto airport anasa quarantine centre ka nung puoka lir.

Ketdangsertemisa pa dang senchi achitsü aser tepuokdak ayutsü, ta amokmeren.

December 8, 2021 nikonngang pai social media aajanga, "Tesüiba ghonda 28 tashi ni kü kija pua lir. Tang ni koba tesem nung aliar ni tejangja meshitetsü aser kodang chiochtsüar memetet. Ni yagi aruba sülen nisung ana dang takdang merüksüi aru. Anogo shia parnoki asemben tashi kishi nung akoshir aser chiyungtsü toktsür, saka ni item chiyungtsüji mechiner. Onok shiruru mesüra ozüing alema inyakeritem ama

züngshir," ta metetdaksü.

Paisa, "Onok kong aliar onoki tejangja memetet. Ni Toronto airport nungi kilometer 2 shi pilar lir, kechiyong ni mapang shia tayimtsü ola angashir. Ozü kinüingertem yagi arutsü memelar. Kü phone nung SIM card mali, ibayongji alima den sendakteptsü atema ni Wi-Fi amshir. Ni yimten lenirtem aser osangbenertem den tongtepratepteter, ibayongj parnoki ni yaritsü merangdar," ta metetdaksü.

December 9 anepdang pai, "Toronto Airport nung parnoki kü dang ni quarantine centre kati yoktsü ta metetdakja liasü. Parnoki kü dang senchi Canada nunger dollar sen 750,000 achitsü mesüra ita 6 tashi tepuokdak ayutsü ta amokmerenogo. Parnoki kü dang nai lawyer ka ajatsü akok

ta ashi, ajisüaka ni kecha aibelena mali, anungji lawyer ajatsü menüingdak ta ni lemet. Africa nung hopta ana tashi ni Khristan aser Muslim nungertem yariogo, business inyakeritem nem hadir alia agütsü, makamaiter nem süoshi agütsü aser kiojen yangluja liasü. Ni vaccine anaprong agiogo aser COVID test negative liasü. Ni wara anema tetuyuba ajak benshiogo, ibayongji ni tepuokdak ayur," ta metetdaksü.

Elijah List teloki Khristanem dang pastor Canning tekaraba nung chiochtsü atema sarasademjang aser ketdangsertem atema-a sarasademjang, ta mepishia metetdaksü.

Darren Canning ya sayutsüingir ka, painter ka aser kaket zülur ka lir.

ANOGO ABEN TSÜNGREM DEN

Kechiba shisabulur?

Filipi 4: 4-7


Asenoki aiben yimkong tsükchir ta jembir. Yimkong tsükchirji shirnok? Shisabulubaji kija shiai anogoshia ajuruba tsükchir tulutiba lir. Ajak tsükchirji shisabulubaji lir.

Asenok ajaki shisabulur. Kari tali shisabulur. Tejangja, shisabuluji meimchir yimya senmang ka lir. Teyongyaba, akangalonga maliba, aser tetsükdak ajak jagi shisabulu adokdaksür. Iba den Laishiba nung ashir kecha nunga temulung tatema. Ibaji jembitsü temüla, saka akoktsü tasak.

Shidakba nung asenoki asenok sasa ibai mokoktettsü. Tanü lesson nung Tanabubaji reprangdang... saka ajak nung sarasademba aser mepishiba aser tenüngsang agi nenoki meshiba Tsüngrem nem metetdakang. Aser Tsüngrem tesünep kobai tangatetba ajak atentanger ajagi Khrista Yisu nung nenok temulung aser tebilemba nüka alitsü.

Anungji, kechiba shisabulutsü? Ya bilemdangang: Tang nai ajuruba shisabulu tulubaji kechi? Nai iba tebilemetsüji Sarasadem nem agütsür asü?

Kaduna State nung ECWA nungi Pastor Rev. Dauda Bature tepset



Rev. Dauda Bature

December 12, 2021: Ita ka tejaklen prangpong amer telok kati Kaduna State nung Evangelical Church Winning All (ECWA) nungi pastor Rev. Dauda Bature puer oa liasü aser tawa parnoki pastor tepsetogo, ta International Christian Concern (ICC)-i metetdaksü.

Kaduna State nung Christian Association of Nigeria (CAN) chairman, Rev. Joseph John Hayab-i, November 8, 2021 nü Rev. Dauda puer oa liasü, aser pa puer aoertemi pa chiochtsü atema ahangba ama pa kinüingtsüi sen bendenba sülen senjia agütsüogo, ta metetdaksü.

"Lai sen bendenba sülen parnoki la dang senji bener arujang ta tuyu. Ajioda November 18 nü lai senji bener otsü, saka parnoki la-a apu," ta Joseph-isa metetdaksü.

"Parnoki December 6 tashi la pua ayuba sülen la chioka ano

sen tali bushijang ta ashi. Anogo ishika dang lirbo parnoki Rev. tepset," ta paisa shisem.

Alima nung Khristanem timba tepsetba linükji Nigeria lir. Taküm August ita nung report ka ajanga ashiba agi, tesüiba küm 12 tsüingda Nigeria nung Islamic kiralongrar aser telungpurtemi nisung 18,500 dak tema puogo aser parnok rongnung Khristan lenirtem aika densema lir.

Taoba ita U.S. State Department-i Countries of Particular Concern (CPC) linüktem nungi Nigeria ageinba sülen November 19 nü U.S. Secretary of State, Antony Blinken-i Nigeria semdangba mapang nung Rev. Joseph Hayab-i pa ajuru.

Tena senden amenba sülen Rev. Joseph-i, "Antony John Blinken den senden amendang US-i CPC list nungi Nigeria agienba atema Nigeria nunger Khristanem mepelar, ta ni pa dang shiogo," ta metetdaksü.

OLONG PAITEP # 6025

1			2		3		4		5	
6		7								
					8					
9				10						
						11				
			12							13
	14								15	
						16				
			17							
									18	
19										

TIPIEN	LANGTSÜNGLEN
2. Teburtemi tejak nung awaba - (8)	1. Temejangdak - (6)
6. T _ _ _ em - (3)	3. Nisung ka mapa inyaksü nübo - (4)
8. Tzük ayudak - (3)	4. Azüntsü asoshi mejemba - (6)
9. Nüngdakba dang timba - (6)	5. Tesangwa agütsüba - (5)
11. Züina ao - (4)	7. Tila masü - (4)
12. Yangi tzü angur - (5)	10. Tebenjem tetsür chanu - (4)
14. Tangar dang nungi tali - (4)	11. Tekolak nung inok - (4)
16. Senyong masü - (6)	12. Tetsüngda - (6)
17. Oadokdi - (3)	13. Tangar inyakba ka inyak - (6)
18. Tzü tarok - (3)	14. Tim masü ta ashi - (5)
19. Yimtaklir aikati iba ya ki den külemi yanglusemer - (8)	15. Asalendong - (4)
	16. Tanü dangtsü - (4)

OLONG PAITEP # 6024 TELANGZÜBA

TIPIEN :	LANGTSÜNGLEN :
1. Telok, 4. Aluru, 6. Ozüng, 8. Emk,	1. Tenükjang, 2. Luden, 3. Kiochtsü,
9. Kin, 10. Teti, 12. Süir, 13. Jen,	5. Lenti, 7. Tajangzük, 11. Teronem,
14. Ola, 16. Talak, 17. Mazük.	12. Sempa, 13. Jahaz.



ALOKBA O WARAKLA NA KÜNÜ ANOGO :

Tsüngsang majung anogo ka Alokba angopui aotsü renemer, tebutü Warakla dang shir apuso.

Tsüngsang kangasa majung akümer, tsünglu nanajen manaba agi kidangi shilanger, wash-up sür, kinungtsü Warakla terongdong tonglochtsür mejanga alidakji Alokba lasa ayaküta tur süpok talem jagi jouka ia mejang. Idangji Warakla züshia aruaka tenük amor ashir.

Warakla : Ümmm, kübuba bo yamala tsüngsang nungya angopui orji tanübo anogo piyong mojetsüano darling.

Alokba : Ok, tamasa nalayak kar chimatsüa no darling.

Lilir : WhatsApp

TANÜBO NAI LANGZÜANG

Q. Koba space agency-i 'Laser Communications Relay Demonstration (LCRD)' khaketa yok?

- [A] ISRO
- [B] NASA
- [C] Blue Origin
- [D] SpaceX

(Taruba adok nung onoki langzüsü)

YASHI ADOK TELANGZÜBA : Uttar Pradesh

AO OSHI ANGAZÜKDAK:

TANÜ ANGAZÜKTSÜBA OJANG



Lisem

(n) long nungi menüngzüka aluba tanük (sand)

* **Lisem** den cement meyoktep nung ano tanaben long akümer.

Lisem

(v) külemi ali (live with)

* Asenok tsümartem den **lisemba** agi tsümar o jembir.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo :
- 3. Küm : 4. Class :
- 5. School :
- 6. Talidak :
- 7. Salem osang :

NAI-A YA METETTER MA

AINDIA NUNG NÜBURTEMI SAPUA AMSHIBA SOCIAL MEDIA ASER MESSENGER APP KAR: 2021

* SOCIAL MEDIA		* MESSENGER APP	
Youtube	85.80%	Whatsapp	74.60%
Facebook	75.70%	Facebook Messenger	55.00%
Instagram	70.60%	Snapchat	33.70%
Twitter	50.60%	Skype	29.30%
LinkedIn	37.70%	Telegram	28.50%
Pinterest	34.30%	Helo	22.90%
Reddit	22.10%	Hike	21.30%

SUDOKU # 6066

TELANGZUBA # 6065

2	8	5			9	4	1	3	5	3	7	4	9	8	2	6	1
	6	1				2			6	1	4	2	3	5	9	7	8
	3		1		2	6		7	2	9	8	7	1	6	4	5	3
						5	2		8	5	1	9	2	7	3	4	6
	5	2	4	6			9		4	2	3	6	5	1	8	9	7
8	9			1		4			7	6	9	8	4	3	5	1	2
	7	8	3			6			1	4	5	3	6	2	7	8	9
3					7	5	2		9	7	2	1	8	4	6	3	5
9		4		8	6	7	3		3	8	6	5	7	9	1	2	4

OJANG LUTEP # 5612

- NGATARI :
- YAKINBA :
- GDAN :
- ATMAI :
- IPE :
- ASSAA :
- JUNTAG :
- ETTAJITA :
- AKTINYSÜ :
- ANGAMERNG :

OJANG LUTEP TELANGZÜBA # 5611

TEKA NUNG ALIBA ALI RONGSEN TENLA MAGÜTSÜDANG TAMASA NA MESHITETANG

TAN HOPTA ATEMA - KOMA SÜLA ?

Q. Nagaland nung India sepaitem ya melidaktsü nunga koma süla ?

Pakistan nungi kiralongraba tera nungi atsüdoktsü: Rajnath Singh



December 12, 2021 nü New Delhi nung India Gate anasa Swarnim Vijay Parv tenzükba sentong nung Defence Minister, Rajnath Singh-i exhibition repranga senzüba noksa nung angur.

New Delhi, Luchii/ December 12 (Agencies): Pakistan-i kiralongraba ajanga India raksatsüner; 1971 küm India nunger sepaitemi Pakistan sentong raksatsü aser tang Pakistan nungi kiralongraba tera nungi atsüdoktsü atema India linüki inyakdar, ta Amongnü Defence Minister, Rajnath Singh-i metetdaksü.

1971 küm rara nung India-i Pakistan madak takok anguba aser India o Bangladesh na temba ayimba sülen küm 50 ajungba nungtem nung Amongnü Swarnim Vijay Parv ayongzüka agi; iba sentong nung

jembidang Rajnath Singh-i iba o ya jembia liasü.

Defence Minister-isa, asen kidanger linüki tang tashi telung nung India den rarar, ta ashi.

"India ana akümbaji tamangba yimsü nung ajemdaker aküm aser iba ya aibelen tulua liasü, ta iba rara ajanga kuli sayur. Pakistan ya yimsü ka nung ajemdaker tenteta liasü. 1971 küm rara nung parnoki tamakok anguba sülen asen kidanger linüki telung nung India den tang tashi rarar," ta Defence minister-isa metetdaksü.

Alima nung world war ana

dak sendakba nung pai, "Aso 20buba (20th century) nung world war ana dang liasü aser itemji küm aika rara. World war ana dak alia Aso 20buba nung rara tesashibatem asadagra 1971 war-a züngsemtsü," ta pai ashi.

'Swarnim Vijay Parv' ya India Gate, New Delhi nung December 12 nü tenzük aser December 13 tashi amongtsü.

Amongnü iba sentong ya Rajnath Singh-i tenzükja liasü. Iba sentong dak sendakba exhibition nung 1971 war nung amshiba raraba hadirtem aika sayadar.

Sorkari banking inyakyim nung temelenshi bener arutsüogo: PM Modi

New Delhi, Luchii/ December 12 (Agencies): Amongnü Ato kilonser, Narendra Modi-i, taoba sorkartem aija, banking tsütsü timtem ajanga sensakertem aser middle class purtem kanga timtema aruogo, ajisüaka tang aliba sorkari item tebilemstü onüktem atema inyaker, ta ashi.

'Depositors First: Guaranteed Time-bound Deposit Insurance Payment up to Rs 5 lakh' sentong nung jembidang Ato kilonser, Centre nung BJP-i aniba sorkari senotsü dak sendakba inyakyim tajungba kuma yanglushiogo aser sensakertem den middle-class purtem tajangzük ngudaktsütsü atema ozüing tasen tenet benokogo, ta metetdaksü.

Paisa, tesüiba anogo ishika tsüingda nisung lakh 1 dak temai pei sen meyipa nguogo; item senji küm aika mengui liasü, ta metetdaksü.

"Küm aika asen linük nung item timtem liasü. Sensakertem aser middle class purtemi banking dak sendakba timtem kanga ajurua aruogo, saka tanübo item tebilemstü samatsütsü atema India-i inyaker," ta Modi-i ashi.

"Tanü ya banking sector aser account lapoka alirtem atema kanga tongtibang anogo ka lir. Tanübo sorkari 'Depositors tama' sädaktsür," ta pai shisem.

Taküm August ita nung Parliament nung Deposit Insurance & Credit Guarantee Corporation (Amendment) Bill, 2021 agizüka liasü, aser iba

ozüing ajanga account lapoka alirtemi anogo 90 tsüingda sen lakh 5 tashi agizükteter.

'Depositors First' nung ajemdaker iba ozüing tasenba kübok sen deposit asür lakh 1 dak temai sen crore 1,300 tashi meyipa nguogo, ta pai metetdaksü.

Linük renlokba nung bank temi tongti shilem ka agir, ta shia Modi-i, "Iba maongka tajungtiba nung agitetsü atema deposit asürtem melung lemdaktsütsüsa inyaktsüla, ibayongji onoki sen lakh 1 tashi dang aliba nungi lakh 5 tashi kümtsüogo," ta metetdaksü.

Kasa sentong nungsa Union finance minister, Nirmala Sitharaman aser RBI Governor, Shaktikanta Das nata densema liasü.

Karnataka nung anti-conversion ozüing atema mangatettep adoker

Bengaluru, December 12 (Agencies): Hombar nungi Karnataka nung asükwa mongpu assembly senden tenzüktsü lia state nung anti-conversion bill onük nung BJP sorkar aser opposition Congress na tsüingda mangatettep adokdar.

Karnataka state sorkari anti-conversion ozüing benoktsü tebilemba lir, saka opposition Congress-i iba ozüing anema nokdaker.

Honibarnüa Hindu right-wing organisations-i BJP sorkar dang taruba assembly senden nungsa anti conversion bill benoka agizüktsüla, ta takhangba agütsüogo.

"Tan assembly nung iba bill mebenokra onoki January 1 nungi tenzük state tesem ajaklen longkak aittsü," ta Sri Ram Sene Tir, Pramod Mutalik-i metetdaksü.

Paisa, ita ishika tejaklen chief minister Basavaraj Bommai-i

Hindu nunger lenirtem dang taruba assembly nung anti conversion ozüing benoktsü ta nangzükogo, ta metetdaksü.

Karnataka nung Congress Party Tir, DK Shivakumar-i, assembly nung Congress-i iba bill anema nokdaksü, ta metetdaksü.

Ano külen Kanataka state BJP-ia social media ajanga, "Anti-conversion ozüing anema Congress telung nunga mangatettep lir. Iba ozüing benokra kar melung yirutsü. Nenok atema Hindu nunger dang nungibo yimtenren nung tajangzük angutsüji tongtibangba," ta metetdaksü.

Rural Development & Panchayat Raj minister, KS Eshwarappa-ia, sorkari iba ozüing agizüktsü, anungji shingai ratamata malitsüla, saka taruba assembly nung asü sangküm assembly nung ang agizüktsüar memetet, ta metetdaksü.



December 12, 2021 nü Jaipur nung Rajasthan Chief Minister, Ashok Gehlot-i airport nung Congress lenir, Rahul Gandhi agizükdang tangokba noksa nung angur. Amongnü Jaipur nung Congress-i Centre anema lokti senden tuluka ayongzüka agiogo.

Congress-i yangluba ajak Modi sorkari ayoktsü meranger: Priyanka

Jaipur, December 12 (Agencies): Amongnü Congress General Secretary, Priyanka Gandhi Vadra-i, Congress-i küm 70 tsüingda yangluba ajak BJP-i aniba sorkari ayoktsü meranger, ta aitsü.

Laisa, Centre nung BJP-i aniba sorkari industrialist kar atema dang inyaktsür, ta aitsü.

Rajasthan kübok Jaipur nung ayongzüka 'Mehangai Hatao Maha Rally' nung jembidang Priyanka-i, "Tang linük nung jenjang kanga atur aser sensakertem timtem olaji shingai mangashir. Tanü LPG cylinder ka nung sen 1000 shi kümogo, mustard oil litre ka nung sen 200 shi kümogo, petrol aser diesel jenjang maneni atur, ibayongji tanü nenok yangi adenshia lir," ta ashi.

Laisa, "BJP lenirtemi China mesüra tanga linüktem indang, kin aser tamangba yimsü indang jembir, saka nüburtim timtemba atemabo mejembir. Tesüiba küm 7 yimsüsüba mapang nung Modi sorkari kechi inyak?" ta asüingdang.

"Sorkar dang item atema tasüingdangba akatsüji nenok

teinyaktsü mapa," ta lai ashi.

Centre nung Narendra Modi-i aniba sorkari parnok medemer industrialist kar atema inyaktsür, ta shia lai, "Sorkar tapu ana lir. Mezüingbuba sorkar jagi nüburtenzüker, nendaka inyaker aser ochishia inyaker; ano sorkar katibo yazü jembir, merumerur aser auyar. Tang aliba sorkar nükjidongji yazü jembitsü, merumerutsü aser auyatsü atema lir," ta ashi.

"Centre nung Modi sorkari, Congress-i tesüiba küm 70 nung kechi inyak, ta maneni asüingdang. Küm 70 indangji mejembitsüla ta ni ashir. Nenoki küm tenet tsüingda kechi inyaker onok dang shiang," ta lai ashi.

Congress lenirisa, küm 70 nung Congress-i yangluba ajak Centre sorkari parnok medemer Industrialist tem dang ayoktsü meranger, ta ashi.

Osettsüset aser chiyungtsü jenjang maneni atuba anema national level nung ayongzüka sentong nungsa Congress Tir, Sonia Gandhi, Rahul Gandhi aser Rajasthan Chief Minister, Ashok Gehlot nunger densema lenirtem aika dena liasü.



December 12, 2021 nü Chennai nung kaketshirtem aser volunteer temi Besant Nagar beach merüktetba mapang tangokba noksa nung angur.



Museum of Liverpool, Liverpool, England nung telok noksa ka tangokba nung G7 foreign minister tem tetsungta iter nokdaka aliba angur. Russia, China aser Iran linüktem den takait linüktem mepetmesü tali adokba mapang Foreign Secretary Liz Truss-i England northwest tsütsü rongnendak yimti, Liverpool nung U.S. Secretary of State Antony Blinken aser Group of Seven nung külem tenzükertem den senden ayongzuka amener.

Australia nung booster shots ama Moderna vaccine agütsütsü

Canberra, Luchii/December 12 (Agencies): Australia-i, Pfizer Inc.' indang vaccine den külemi booster shot ama amshitsü atema Moderna Inc. indang Covid-19 vaccine bendenlokogo aser iba den dose tsüingda mapang tajemba kümdaktsüogo. Covid-19 omicron variant prokshia aoba ajanga tebilemtsü kaa iba jenjang agiogo.

Australia nung vaccine mezüingbuba dose ana agiba sülen booster shot agitsü atema ita trok ataa aliba tang ita pongu dang kümtsüogo. Iba jenjang agitsü atema Australian Technical Advisory Group on

Immunization-i temelaba agütsüogo, ta health department-i Deobarnü sangdong ka ajanga metetdaksü.

"Covid-19 omicron aser delta variant naprongla menatepba aotsü ana nung aliba temulungdang jur ATAGI-i tetuyuba agütsüshio, aser vaccine mezüingbuba dose ana agiba sülen ita pongu lir booster dose agütsütsü atema tetuyuba agütsüogo," ta department-i ashi.

Australia nung nütsünyongsük timtiba aliba state; New South Wales nung anogo torok tsüingda tashidak menatepa aoba jenjang Deobarnü tajemba liasü. State

sangdong ka ajanga ashiba agi, Deobarnü nisung 485 dak tashidak potet, koba Honibarnübo nisung 560 dak poteta liasü. Victoria state nunga Honibarnü nisung 1,193 dak tashidak poteter liasü, ajüsüaka Deobarnübo nisung 1,069 dang kümogo.

Health department-i ashiba agi, Australia nung 670,000 nem vaccine dose ana dak nungi tali agütsüogo. Vaccine dose tsüingda mapang ajemtsüba tetezü nisung million 1.5 Deobarnü nungi tenzuka booster shot agitsü atema temsüa akümtsü, ta Herald Sun osang kaket sangdong ka ajanga metetdaksü.

Palestinian nunger 400,000-i municipal election nung vote agütsü

Ramallah, Luchii/December 12 (Agencies): Honibarnü Palestine nungeri atsünger aliba West Bank nung nisungtemi municipal election nung shilem agiogo. Sorkar dang ita aika mepelai aruba den taküm küm tetenzüklen parliamentary aser tir election agitsü nangzükba ama minyakba atema nüburtem mepelai aliba mapang tang iba election agiogo.

Palestinian nunger 400,000 shi vote agütsütsü temsüa liasü, kong parnoki Fatah-i azüokba Palestinian Authority kübok yimtsüing council 154 atema lenirtem shimtsü. Municipal election ya küm pezü nungi pongu tsüingda agir aser tatemsa 2017 küm agia liasü.

Palestinian Authority tir Mahmoud Abbas-i, election ya yimdak yimtsüingtem nung dang agitsü temelaba agütsü aser West Bank kübok yimtitem nung election thinentü, kong nüburtemi pai aniba Fatah party dang kanga mepelar.

Honibarnü election nung telungpur Hamas telokia shilem magi, shirnoki Gaza Strip yimsü asür. Hamas otongdar

Abdulatif al-Qanou-i, Associated Press dang ashiba agi, par teloki parliamentary aser tir election aginer aser municipal election kija agiba ya taoba mapang mulungtepba ama masü, ta ashi.

Tanü election agiba ajanga Palestine nungertem tejangraba meperitsür. Mapang talangka nungi yongyatepa ataa aliba legislative aser parliamentary election Abbas-i April ita thitsüba sülen Palestine sorkar jenjang tamajungba küma odar aser nüburtemi parnok magizüker.

Jerusalem anütoklen aliba Palestine nungertemi vote agütsütetsü magütsütetsü mejangjaba ajanga election athi ta Abbas-i ashi, ajüsüaka par party-i Hamas makoktsü ta tsübuba ajanga election thinen ta shia critic temi pa aitsü.

May ita Israel den anogo 11 raraba sülen West Bank aser Jerusalem anüdoklen Palestine nungertemi Hamas telok tesapuba kümogo aser Palestinian ketdangsürtemi Israel anema jenjang magiba atema nisung aikati aija arudar.

US midwest tsütsü yipru tesashi agi nisung aika asü

Washington, Luchii/Dec. 12 (Agencies): Tornado yipru tesashi agi ki-o-jen aika raksaja nisung 100 shi asüba state tem nem US Tir Joe Biden-i teyari agütsütsü nangzükogo.

Iba yipru ya US otsü nung tesashitiba rongnung ka asütsü ta shia iba yipru agi tesashitiba kongshiba state, Kentucky atema Biden-i Honibarnü emergency disaster sangdongtsü mela, kong nisung 22 asüba jangjaogo.

"Ibai lendong tulu lir. Aser asenoki tang tashi nisung kwi asü mesüra koba tashi raksatsü'ar memetet," ta Biden-i rataseta ashi.

"Kechi nüngdaker, ibaji agütsütsü asoshi federal sorkari lenmang bushitsü ta ni nangzükur," ta pai ashi.

Iba yipru ya asükwa mapang aiben majangshiba ka lir, ta tzüngsang-mopung takzür temi ashi, aser iba yagu Mayfield, Kentucky nung candle factory ka raksatsü, anasa aliba Arkansas nung nursing home ka aoyi kuma petsa aser Illinois kübok Amazon warehouse ka nung inyaker nisung trok takum samatsü.

Iba tornado tem meyoktepba ya state otsü nung tamajungtiba liasü, ta Kentucky Governor Andy Beshear-i ashi. Candle factory nung inyaker nisung 40 shi kumzükogo, aser iba ki jana kuma raksatsüba mapang telung nung nisung 110 shi liasü.

Jana-reja telung nung nisung kar danga takum lira ajibo sayatenya ka asütsü, ta Beshear-i ashi.

"Iba yipru ajanga teraksa



Mayfield, Kentucky nung yipru tesashi agi raksatsür aliba ki nungi nisungtemi osettsüset agizükba mapang tangokba noksa nung angur.

bener arutsüba ama kü takum nung kodanga mongudang aser tepang agi rasa meshitet. Yangi Kentucky nung nisung 100 dak tema sür alitsü," ta Beshear-i osangbener senden ka nung ashi.

Social media nung video aser noksa tem prokshiba nung downtown Mayfield nung longru agi yangluba ki chirepa anasa gari anena aliba nungbanger liasü.

Mayfield Fire Chief Jeremy Creason-i ashiba agi, candle factory ya yinsang-yinre aser steel aser gol tem dang anüing aser teyariteper temi takum alirtem kumzüksü asoshi apoa aotsüsa akum. Creason aliba fire station ya iba yipru ajanga raksaja liasü.

Mapa inyaker kati Facebook nung teyari meshia liasü.

"Onok temai madokteti nembanga lir, imlibilema teyari kar danga yokang," ta tetsür kati jeba ashi aser la den külemi mapa inyaker ka la anasa nünga liasü. "Onok Mayfield nung candle factory nung lir... Imlibilema nenok ajaki onok atema sarasademjang."

Tetsürla ya Kyanna Parsons-Perez liasü, aser la ya jana feet pungo shi telung nung ghonda ana shi lir kumzuka liasü.

Northeast Arkansas nung yipru tesashi ka densema amjang tepiyong tesem balala nung yipru tesashi aitba nungi iba tornado ya tenzuka liasü. Yipru ya Arkansas aser Missouri nungi tenzük aser

Tennessee aser Kentucky ajanga ao.

Illinois, Kentucky, Tennessee, Missouri, Arkansas, aser Mississippi nung tornado 36 agi kongshiba osang lir, ta National Weather Service's Storm Prediction Center ajanga ashi.

Yimya agi temperature aser humidity tali akumba ajanga iba ama tzüngsang tamajung ya adokdaksür, ta Northern Illinois University nungi geographic and atmospheric sciences nung professor, Victor Gensini-i ashi.

Iba lendong atalokli osang aruba ya tejangja asünungbo, iba yipru ya mile 250 (kilometre 400) shi nung kongshio, aser ibaji 1925 küm March ita Missouri, Illinois aser Indiana ajanga mile

220 (kilometre 355) shi nung tsüingnep yutsüba dang nungi talangba alitsü, ta pai ashi.

Environmental Protection Agency dang tzü-mopung melenba nung kechi ajanga iba ama yipru ya adokdatsü ta asadangtsü ashitsü, ta Biden-i osangbener dang ashi.

"Jelia tekum dangtsü agütsür na? Aser jelia tekum dangtsü ashiba ya ajaki metettsüsa agütsü asü masü aser yangji nüburtemi anidak asü manidak?" ta pai ashi.

Edwardsville, Illinois nung Amazon warehouse laodak nisung trok asü, ta Fire Chief James Whiteford-i ashi. Yangji nisung 45 shi takum kumzuka liasü.

Alabama nung aliba Amazon facility ka nung mapa inyakertem anidentsü merangertem, Retail, Wholesale and Department Store Union ajanga tzüngsang majungdang Illinois nung office lapoka ayuba atema aija liasü.

Monette, Arkansas nung yipten 90 aliba nursing home ka tornado kati raksatsüdang nisung ka asü aser pungo kanga mejungi yirua liasü.

Tennessee nunga nisung pezü aser Missouri nunga nisung ana süa liasü.

Honibar nikongdang Kentucky nung kibong 99,000 aser Tennessee nung kibong 71,000 shi power meliasü, ta PowerOutage.US ajanga ashi.

Kentucky nung ketdangsürtemi nüburtem dang lenmang nung mesenzütsü aser azü tenla agütsütsü sangdonga liasü.

MOLUNGNEN O



Tongmelang ochishir akümdong arishir Asür **MARMONGBA LONGKUMER** (Longjang) Tsüngremi arishi 104 tashi moatsür 02/12/2021 nü iba akümüli toksür aodang kija, kibong, Arogo, lokti balala ana aser bendanglen nungi nübu, rongsen aser sarasadem agi yaritepba asoshi kanga pelaba lemsateper.

Tsüngremi nenok mapa tajung maneni moajangma.

~ Chirnur, Mezüng, Tanabuba, Tasembuba Semchirtem, Anükapang & Kinungertem.

Rajinikanth Foundation-i kaketshir 100 yaritsü

Chennai, Luchii/December 12, 2021 (Agencies):

Deobarnü, Superstar Rajinikanth asoba anogomung nung, Rajini Makkal Mandram-i, Tamil Nadu Public Service Commission (TNPSC) ajanga achaayangba exam tem atema, Rajinikanth Foundation-i sensaker/senotsü peria maliba kibongtem nungi kaketshir 100 nem training agütsüsü, ta ashi.

Rajini Makkal Mandram, Convenor V.M. Sudhakar-i Twitter sabang nung iba osang lemsatepa liasü.

Sudhakar-i ashiba agi, "Superstar Sri Rajinikanth sor küm 72 ajungba nungtem nung, TNPSC ajanga achaayanga agiba exam tem atema lokti nung sensaker aser senotsü agi kanga timtemba kibongtem

nungi kaketshir 100 nem training agütsüsü asoshi Thalaivar-i pelashishia sangdongogo."

Küm shia December 12 anogo atongtsü asoshi fans nungi medemertem aser film industry indang züngsemtem kanga yongya atar.

Deobarnü (Rajinikanth asoba anogo) Chennai kübok Rajinikanth talidak kima nung temulungertem adenshia salem lemsatepa liasü.

Ato Kilonser, Modi aser Dhanush napronglai Rajinikanth den salem lemsatepogo. Fans karibo Rajinikanth nem sempet bener aruja liasü. Social media sabang nung fans aser temulunger aikati Rajinikanth asoba anogo nung pa den den salem lemsatepogo.

Ed Sheeran-i gitar ka tenla agütsü



Luchii/December 12, 2021 (Agencies): Ed Sheeran-i pa talidak primary school ka nung pa indang gitar tenlaogo.

Arishi küm 30 tain 'Shivers' kentener Ed-i pa indang kensep tasenba '=' meyagludang, iba gitar amshia liasü aser pai iba gitar ya Framlingham, Suffolk kübok Sir Robert Hitcham indang CEVA School nung raffle ka atema sempet ama agütsü. Iba fund ajanga music pod ka yanglutsü aser matamabensar tem yaritsü.

"Iba gitar ama tanga gitar mali. Tanga gitar tem ola tendangtsü/angadangtsü atema iba gitar amshir. Iba gitar takok angütsü asoshi, pound 5 charity nung agütsüsü. Iba ya ajanga ni aliba tesem anasa

primary school nung music centre ka yanglutsü aser iba atema ni kanga yongyar," ta Ed-i BBC dang ashi.

NME sangdong ajanga angazükba agi, iba gitar fret tenetbuba nung custom maple inlay, truss rod cover aser neck heel cap nung butterfly inlay motif ka aser custom-designed edition internal label ka dena lir.

Iba fund raiser raffle - runners-up atema 'Bad Habits' kentener Ed-i sign ser aliba Ipswich Town Football Club 2021-22 home shirt asem tenlaa liasü.

Ed ya tebu ka akümba sülen, pai mapang shia tenla balala agüja arudar. 2020 küm August ita Popstar Ed aser pa kinungtsü Cherry Seaborn nem jala ka (Lyra) moatsü.

Jason Momoa-i 'Aquaman and the Lost Kingdom' tangokmaogo

Luchii/December 12, 2021

(Agencies): Hollywood star Jason Momoa-i Aquaman indang sequel tangokba maparen tembangogo aser pai social media nung iba osang lemsatepa liasü.

Jason-i, "'Aquaman 2" tangokmaogo. Iba film ajanga fans den otsü aika lemsateptsü yongyaseter. Akok asübo nenok dang iba film indang otsü kar lemsateper," ta ashi.

DC Extended Universe nung 'Aquaman and the Lost Kingdom' ya film 13buba asütsü, kong Momoa-i superhero Aquaman/Arthur Curry ama shilem agiba angütsü. Otsü ajanga angazükba agi Aquaman dak tzü kara kara awatsü aser tzüym nung aliba shiruru den jembitsü sempet keta lir.

'Aquaman and the Lost Kingdom' film ya sangküm

December 2022 nung sayatsü.

Social media nung, Jason-isa video ka lemsatepa liasü. "Maparen tembanger kidangi tanaben shilangogo. Nenok dang otsü balaka sayatsü renema lir. Mapang tatsüka anisüngzüka kazütsü tebilemba lir. Aloha," ta pai ashi.

Jason-i Hawaii atema sen bendentsütsü meranga inyakogo aser post balaka nung pai, "Hawaii nung maparen renemogo. Aquaman 2 reprangtsü asoshi nenoki atatsüla, saka nenoki kü indang bio tasen Knoxville den @electric nung reprangtetsü akok. Iba tzümeküti nung alir nüburtem ajangzüksü atema @sustainablecoastlineshawaii nung teyari agüjang. Aloha J," ta lemsatepa liasü.

November ita tetenzüklen, iba film indang official account

nung, film director James Wan-i production maparen United Kingdom nungi Hawaii belenba metetdaksü. Iba film shilem kar Oahu indang Halona Beach Cove nung tangoka liasü.

Sangdong ka ajanga angazükba agi, iba sequel nung Amber Heard, Nicole Kidman, Temuera Morrison, Yahya Abdul-Mateen II, Patrick Wilson aser Dolph Lundgren densema original cast temi pei tata shilem agiba angütsü. Parnok den cast tasen ana - Indya Moore aser Jani Zhao nungeri taruba project nung shilem agiogo.

James Wan-i director ama inyakogo. Kasa mapang, iba project atema DC Films, The Safran Company aser Atomic Monster Productions temi senotsü agüja nungitogo. Warner Bros. Pictures ajanga iba film sayatsü.

Honda Activa 125 'Premium Edition' sayaogo

New Delhi, Luchii/December 12, 2021

(Agencies): Honda Motorcycle & Scooter India-i Activa 125 indang edition tasen - 'Premium Edition' sayaogo. Iba scooty jenjang sen 78,725 (drum brake version) aser sen 82,280 (disc brake model) (ex-showroom, Delhi) asütsü.

Tang shishilembadak anguba standard Activa 125 dang nungi special edition ya sen 1,000 agi timba asütsü. Iba edition nung, dual-tone body colour, blacked-out engine casing, aser tesülen body-coloured grab handle inoksema yanglutsüogo.

Honda Motorcycle & Scooter India, Managing Director, President & CEO, Atsushi Ogata-i, "Shishilembadak Activa sayar



külen nungi sales nung temelenshi tulu adokdakja customer aika atsüa aruogo. Activa sabang nung iba edition tasen bendenlokba den, product quality tajung agüja aser tamshirtemi iba product nung temulung adoktsüsa Honda-i maneni inyakogo. Activa 125 Premium Edition ajanga customer timba atsüa arutsü imlar," ta ashi.

Activa 125 Premium Edition metetpelatsüba mapang, Yadvinder Singh Guleria, Director - Sales & Marketing, Honda Motorcycle & Scooter India-i, "India nunger million aikati iba scooty sapur. Linük tesem ajunga nung 2Wheeler customer nungdak balala peridaksütsü asoshi shishilembadak Activa ya two wheeler tetemjen ka ama sayuogo. Activa 125 Premium Edition nung design yimya aser color scheme nung temelenshi kar angütsü," ta ashi.

Honda Activa 125 Premium Edition ya sentsü ana - Pearl Amazing White den Matte Magnificent Copper Metallic aser Matte Steel Black Metallic den Matte Earl Silver Metallic nung angütsü.

Seth Rogen aser Elle Fanning na longjemtsü

Luchii/December 12, 2021

(Agencies): 'Chippendales' indang cast rongnung actor Seth Rogen aser Elle Fanning na anioktsü jembidar. Iba project ya shitakba otsü nung ajemdaker yanglutsü. 'I, Tonya' director Craig Gillespie-i direct asütsü aliba film nung 'Lion' star Dev Patel-i shilem agütsü.

Patel, shibai 'Chippendales' nung shilem agütsü asoshi 2017 küm sangdonga liasü, pai iba film nung Steve Banerjee ama shilem agütsü lemsükja lir.

Iba project jembiba ama mapa küma inyakra, Rogen aser Gillespie na tanaben longjemba angütsü. Hulu atema Rogen aser Gillespie nati 'Pam and Tommy' series

nung longjemer inyakogo, ta sangdong ajanga metetdaksü.

'Chippendales' nung Fanning nem Stratten aser Rogen nem Nick De Noia character shilem lemsüktsüsü jembidar. Craig Williams aser Isaac Adamson nati drafts zülur sülen Chippendales atema Lauren Blum aser Rebecca Angelo nati script zülushidar.

Money Heist spin-off Berlin yanglutsü sangdongogo

Luchii/December 12, 2021 (Agencies): Netflix nung Money Heist tatembang ka dangi arudar, ajisüaka iba series nung nungtugu character Berlin dak ajemdaker spin-off show ka iba streaming service nung yanglu tenzükogo.

Netflix-i, spin-off project ka yanglutsü sangdongogo, kong actor Pedro Alonso-i Andres de Fonollosa shiba dang Berlin ta ajar, pa indang shilem agiba angütsü. Berlin ta nungja agütsü iba show ya 2023 küm sayatsü renema lir, ta Deadline sangdong ka ajanga metetdaksü.

Money Heist nung Berlin ya character tem rongnung kanga nungtugu ka liasü. Fan temi pa ya kanga dang tesangra,

tepuatsüka aser sasapela aketba character ka amaka sakloka repranger, ajisüaka pa ya tetsür sempaba aser azütokshi agi sünger aliba nisung ka lir.

Show tasenba indang osang tejangja mali, ajisüaka show yanglurtemi Berlin ya bener aruner kechiyong iba character ya Money Heist tanabuba season tatemlen süogo.

Money Heist tatembangbuba episode pongu December 3 nü nungi tenzüka sayatsü lir tang iba spin-off show yanglutsü atema osang sangdongogo. Iba Netflix series ya Professor (Alvaro Morte)-i anir auer telok kati Royal Mint of Spain aser Spain nung Bank ka auyaba indang otsü lir.

Money Heist season pongu aser tatembangbuba ya episode pongungu ta shilem ana küma lemsar lir. Mezüngbuba episode pongu Netflix nung September 3 nü nungi tenzüka sayuogo.

Kasa mapang nung Money Heist, Korean adaptation nung Squid Game actor Park Hae-soo-i Berlin shilem agütsü. Money Heist, Korean adaptation ya Kim Hong-sun-i direct asütsü, shibai The Guest aser Voice nunger amala TV drama tem direct süogo.

Ryu Yong-jae aser par team-i episode 12 atema script zülutsüsü. Money Heist, Korean version ya Entertainment aser Contents Zium-i produce asütsü.

MH-10-i 2buba All Nagaland Open Volleyball Tournament kokogo



Dimapur, Luchii/December 12 (TYO): 2buba All Nagaland Open Volleyball Tournament MH-10-i kokogo. Final asaya nung parnoki Kimipfuphe Southern Angami Youth Organization koka liasü.

Iba asayamung ya Horua Welfare Society-i ayongzüka Dimapur kübok Indisen yimtsüng Gound nung December 10 aser 11 nü asayaa liasü. Final asayaba team ana yagi semifinal nung Volleyball For Peace Longsa aser Elite Spikers Dimapur na koka liasü.

Asayamung akokba team nem senpet sen lakh 1 agütsü

asertanabuba jenjang nung tembangba team nem senpet sen 70,000 agüja liasü. Maneni semifinal nung tamakok anguba team ana nem senpet sen 20,000 (team anaprongla nem) agüja liasü.

Jurila sempet tem rongnung Best Spiker naroküm Kimipfuphe Southern Angami Youth Organization nungi Menuokho Ngukha nem, best setter naroküm MH-10 Kohima nungi asayar Akum nem aser Best Player naroküm Changtongya Volleyball Association nungi Imnungkumba nem agüja liasü. Parnok asemprongla nem

senpet sen 5000 (asayar shia) agüja liasü.

Asayamung shibangba sentong nung alakteta jaoker ama Temsukaba Longkumer-i arua shilem agi.

Kasa mapang nung asayamung tatembangbuba anogosa Horua Welfare Society-i ayongzüka Raffle Draw osang sangdonga liasü.

Takok anguba number tem yamai alitsü:

1st Prize: 1456

2nd Prize: 2110

3rd Prize: 3243

Consolation Prize: 7779, 5332, 3625, 3931, 3888, 2430, 0053, 4099, 0853, 7382

Asian Rowing Championship: India-i gold 1 aser silver 3 angu

Luchii/December 12, 2021 (Agencies): Deobarnü Asian Rowing Championship nung India nung rower Arvind Singh-i, lightweight men's single sculls event nung gold aser külem India nung asyartemi silver medal ngua liasü.

Arvind-i 7:55.942s nung alizüng tongteta asaya akok.

Tokyo Olympics nung men's lightweight double sculls nung Arvind aser Arjun Lal Jat na 11buba nung tembanga liasü aser tang iba asayamung nung pai Uzbekistan, China, Vietnam, Indonesia aser Thailand nung asyartem

ajateta liasü.

Maneni men's lightweight double sculls, men's quadruple sculls aser men's coxless four events nung India nung asyartem silver medal ngua iba asayamung tembangogo.

Iba asayamung nung ajak senteper India nung asyartemi gold ana aser silver pezü nguogo.

lightweight men's double sculls nung Ashish Phugat aser Sukhjinder Singh nati alizüng 7:12.568s nung tongteta silver angu aser men's quadruple sculls nung Bittu Singh, Jakar Khan, Manjeet Kumar aser

Sukhmeet Singh nungeri alizüng 6:33:661s tongteta silver angu. Parnoki 0.523 second agi dang temaba jenjang anguba team memenepe liasü.

Ano Jasveer Singh, Punit Kumar, Gurmeet Singh aser Charanjeet Singh nungeria men's coxless fours final nung silver nguogo.

"India team-i kanga junga asayaogo. Rower tem, coach tem, support staff aser ketdangsürtem ajak nem tenüsang agütsür," ta Rowing Federation of India secretary general, MV Sriram-i sangdong ka ajanga lemsatsep.

West Indies nung cricket asaya asem dak COVID-19 potet

Luchii/December 12, 2021 (Agencies): West Indies nung cricket asayar asem dak coronavirus tashidak potetogo aser parnok asem taruba hopta nungi tenzüka Pakistan den asayatsü aliba limited-overs series nung shilem magitetsü.

Cricket West Indies-i Honibarnü sangdong ka ajanga ashiba agi, left-arm fast bowler Sheldon Cottrell and all rounder Roston Chase aser Kyle Mayers nung dak Karachi nung covid tashidak potetogo aser parnok lokti nungi pilar

anogo 10 temang anepalutsü.

Parnok asemprongla Twenty20 squad nung densema liasü aser Chase bo Karachi nung asayatsü aliba one-day asaya asem atema-a shimmer liasü.

Kasa mapang nung West Indies staff non-coaching züngsem ka daka tashidak potetogo. CWI-isa, parnok pezüprongla vaccine dose anaprongla agiogo aser tashidak keta aliba temaitsü kangabo mesayur, ta metetdaksü.

CWI chief executive

Johnny Grave-i, team nung tanungba nüburttem ajak dak tashidak tendangba shia tashidak mepoteti arudar aser renemer aliba ama asayamung asayatsü, ta ashi.

T20 asaya asem asayatsü aliba ya Hombarnü nungi tenzüksü.

Taoba ita T20 World Cup asayaba mapang limited-overs squad captain Kieron Pollard yiruba ajanga team nung tapok adoker aliba mapang tang ano asayar asem dak tashidak potetba ajanga WI team jenjang mejungi kümogo.

Vijay Hazare Trophy: Iyer-i ball 113 nung run 151 yanglu

Luchii/December 12, 2021 (Agencies): Tang asayaa aliba Vijay Hazare Trophy nung Madhya Pradesh nungi asayar Venkatesh Iyer-i maneni kanga junga asayaa anogo pezü tsüngda tanabuba century yangluogo. Chandigarh den asayaba mapang pai ball 113 nung run 151 yanglu aser iba asayamung nung tang tashi nung pai run 348 yanglua lir.

Iyer-i four ti aser six asem azük aser Aditya Shrivastava (70) den senteper run 122 yanglua Madhya Pradesh team-i over 50 nung wicket 9 out ser run 331 yangluba nung teyari tulu agütsü.

Madhya Pradesh team asayar 4 out ser run 56 dang yanglu aliba mapang Iyer batting ameni ait aser pai kanga junga asayaa par team takok dangi ani. Iba ajanga pa India team nungi asayatsü atema tokteperitem rongnung kanga dang tongtibang asayar ka kümogo.

Uttarakhand den taoba asaya nunga pai ball 49 nung run 71 yanglu aser tongtibang wicket ana agia liasü. Iba masüdag Kerala den asayaba mapang pai ball 84 nung run 112 yanglu aser run 55 agütsür

wicket 3 agia liasü. Iba asaya nung Madhya Pradesh-i asayar 9 out ser run 329 yanglua run 40 agi asaya akok.

IPL nung KKR nungi asayaba mapang Iyer-i run 370 yangluba den bowling dena ontetba ajanga pa national team nung anio.

Arishi küm 26 tain asayar ya New Zealand den India nung T20 asayaba mapang national team nungi asayatsü atema mezüngbuba shim aser pa asaya asemprongla nung asayaa liasü.

Iyer ya Madhya Pradesh team nung middle order batsmen ka ama asayaa arudar, aser iba ajanga pa asayaba jenjang ya team India management-i pa nem shilem agidaksünüba jenjang ka ta angateter. Pa Hardik Pandya melener ka ama asayadar, shiba bowling asütsü asoshi temang agi memelar aser batsmen ka ama dang asayadar.

Iyer-i finance nung MBA degree nguogo aser Chartered Accountancy tatidanga ajangetetogo. Pa nem multi-national auditing company Deloitte-i mapa agütsü saka cricket asayatsü atema iba mapa magizük.

BFI Zonal asayamung atema NBA-i asyartem sangdongogo



Dimapur, Luchii/December 12 (TYO): Nagaland Basketball Association-i Brehostibarnü, taruba BFI Zonal Senior Men National Championship 2021 atema senior tebur basketball team nung asyartem sangdongogo.

Iba asayamung ya Basketball Federation of India-i ayongzüka aser Meghalaya Basketball Association-i achaayanga December 16 nungi 19 tashi St. Anthony's Higher Secondary School, Shillong, Meghalaya nung asayatsü renema lir.

Nagaland team nung asayar 12 ya Nagaland head coach Tiameren Amri aser team manager Sentiningsang Longkumer na lenisüba nung oa iba asayamung nung shilem

agütsü, ta Nagaland Basketball Association Hon. Secretary, Zasivi Meyase-i sangdong ka ajanga metetdaksü.

Asyartem yamai alitsü :

1. Salew Kadete
2. Keviu Kesiezie
3. Seyievizo Kire
4. Khrietseizo Khezhie
5. Junmani Baruah
6. Keneitseizo Belho
7. Keneingutou Kevin
8. Vikuo Israil
9. Rongsennungba
10. Vitoto Chisho
11. Rajan Nayak
12. Chumbenthung Humtsoe

RESERVE PLAYERS:

1. Rilise K Thonger
2. Imyangluba Lemtur
3. Keneizelhou Kevin Tale
4. Vikukhol Zao.

BILEMDANGANG

"Yazüyapongertem dak shingai tamang maker."